



आदिवासी जनजाति मन्त्रालयमा माग आदिवासी जनजातियूगु विशेष भेला

ज्वजलपा वाःपौ /

नेपाःया आदिवासी जनजातियूगुसं मंकाः कथं जनजातिया मुह्यात ज्वना न्ह्याः वनेगु तयारी याःगु दु ।

लिपांगु इलय् वया आदिवासी जनजातियूगुसं आः राज्यं थःपिनिगु नितिं जनजाति प्रतिष्ठान जक मखु आदिवासी जनजाति मन्त्रालय तकं दयेकेमाः धकाः माग यानाहःगु दु । ता ई न्ह्याःनिसं जनजाति छप्पं जुइ मफयाच्चन धकाः धयाच्चंगु अवस्थाय् अथे जनजातियूगुसं जनजाति मन्त्रालयया माग याःगुयात मनूतयूगुसं अर्थपूर्ण रुपं कयाहःगु दु ।

नेपाःया आदिवासी जनजातियूगु मंकाःगु संगठन नेपाल आदिवासी जनजाति महासंघपाखें ता ई लिपा जनजातियूगु विशेष भेला याःगु खःसा उगु भेलाय् जनजाति मन्त्रालयया माग यायेगु ज्या सरोकारवालातयूगुसं यानादीगु खः ।

एमालेया नेतृत्व अले एकीकृत माओवादी नापं संघीयता विरोधी पार्टी राष्ट्रिय जनमोर्चा नेपाल अले राजसंस्थावादी पार्टी राप्रपा नेपाल तकं दुथ्यानाच्चंगु नापं एमालेया अध्यक्ष केपी शर्मा ओलीया नेतृत्वय् दुगु वर्तमान सरकारं आदिवासी जनजातियूगु नितिं ज्या याइगु सरकारया छगू आधिकारीक निकाय आदिवासी जनजाति उत्थान राष्ट्रिय प्रतिष्ठान खारेज याइगु जुल धकाः खं पिहां वयाच्चंगु अले खारेज यायेगु नं कृतः यानाच्चंगु अवस्थाय् नेपाःया आदिवासी जनजातियूगुसं आदिवासी जनजाति मन्त्रालयया माग याःगु खः ।

प्रतिष्ठान जोगाय् यायेत नियमित छलफलय् दुगु महासंघं शुक्रवार राजधानी महासंघनाप आवद्ध ५६ (न्यय् खुगु) आदिवासी जनजाति संघसंस्थातयगु विशेष भेलाया आयोजना याःगु दु ।

नेपाल आदिवासी जनजाति महासंघया अगुवाईलय् जनजाति प्रतिष्ठान जोगय् यायेत आन्दोलनया ज्याभवः सार्वजनिक यायेत अन्तिम तयारी जुयाच्चंगु महासंघ अध्यक्ष नगेन्द्र कुमार कुमालं धाःगु दु । राजधानी जूगु विशेष भेलाय् आदिवासी जनजाति अगुवा व बुद्धिजीवी डा. चैतन्य सुब्बा तथा सवैधानिक कानून विज्ञ अधिवक्ता खुशीप्रसाद थारुं कार्यपत्र पेश याःगु खः ।

डा.सुब्बां प्रतिष्ठान गठनया प्रक्रिया व अन्तर्राष्ट्रिय अनुभव बारे कना दिल सा अधिवक्ता थारुं व्यवस्थापिका संसदय् ऐन निर्माण प्रक्रिया व आदिवासी जनजाति सभासदपिन्सं भित्ते फइगु भुमिकाया विषय कार्यपत्र प्रस्तुत याःगु खः ।

भेलाय् प्रतिष्ठान जोगाय् यायेगु पक्षय् जनजाति महिला महासंघया अध्यक्ष शान्ति जिरेल, जनजाति महासंघया पुर्व महासचिव आडकाजी शेर्पा, नेवा



देय् दबूका अध्यक्ष नरेश ताम्राकार, ताजपुरिया समाजया नित्यानन्द ताजपुरिया, डोल्पो समाजया नोर्भु घले, याख्खा छुम्माया दिपक याख्खा, दुरा समाजया गकुल दुरा, आदिवासी जनजाति चलचित्रया अध्यक्ष अमृत सुनुवार, नेपाल मगर संघया गंगा खासुर, याक्थुम चुम्लुङ्गाया प्रेम याक्तेन, तामाङ घेदुङ्गा मोहन गोले, जनजाति युवा महासंघया ज्ञानेन्द्र पुनमगर, जनजाति विद्यार्थी महासंघया डुजाङ लगायत न्ववाना दीगु खः

। आदिवासी जनजाति उत्थान राष्ट्रिय प्रतिष्ठानया १५औं सञ्चालक परिषद बैठकं प्रतिष्ठान सम्बन्धि लिपांगु इलय् वःगु चासो विषयया निराकरण यायेत गठन याःगु विशेष कार्यदल जनजाति प्रतिष्ठान जोगाय् यायेत क्रियाशिल जूगु दु । जनजाति महासंघया समन्वयनलय् कार्यदल आदिवासी जनजाति नेता, मुख्य राजनीतिक दलया जनजाति नेता, जनजाति महासंघ पुर्वपदाधिकारी, प्रतिष्ठानया

पुर्वपदाधिकारी, जनजाति विद्यार्थी महासंघ, जनजाति महिला महासंघ, आदिवासी जनजाति गैर सरकारी संस्था महासंघ, जनजाति चलचित्र महासंघ, जनजाति युवा महासंघ लगायतया सरोकार पक्षनाप अन्तक्रिया सम्पन्न याःगु दु । कार्यदलय् तमु ह्युल छोज धिया नायो रेशम गुरुङया संयोजकत्वय् दावा छेजुङ, चन्द्रविक्रम राई, युवराज जिरेल, अमित मेचे व मुकुन्द पहरी च्वंगु दु ।

क्रान्ति विरुद्ध वनाच्चंगु सत्ता भव्या धुँ जक खः सताब्दी पुरुष जोशी

ज्वजलपा वाःपौ /

शताब्दी पुरुष संस्कृतिविद् सत्यमोहन जोशी संघीय गठबन्धनया रिले अनसनय् ऐक्यवद्धता क्यनादिसं जनतां याःगु क्रान्तिया विरुद्ध लगय् जुइपिं प्रतिक्रियावादी सत्ता आखिर भव्या भ्वजक जुइगु धयादीगु दु ।

जनतायात थःगु पहिचान धइगु दक्खिसिं अजः यइगु खः । थौकन्हे जनतां माग यानाच्चंगु धइगु इमिगु पहिचान व स्वायत्तता खः । थुकी राज्यं हस्तक्षेप मयाःसां ज्यू । आखिर य् जनतां त्याकाः त्वती ।" वयकलं धयादिल । संस्कृतिविद् सत्यमोहन जोशी थःगु चिकिचा हाःगु मन्तव्यय् धयादिल

“१९९७ सालय् राणातसं युगकवि सिद्धिचरण श्रेष्ठयात सर्वस्वसहित जन्मकैदया फैसला यासंलि नेवाः समुदायं क्रान्तिई साथ ब्यूगु खः । आः नेवाःतयगु साथ संघीय गठबन्धनयात दुगुलिं थ्व आन्दोलन निश्चित रुपं सफल जुइ ।”

काठमाडौंया खुल्लामञ्चय् २६दिनसिं पहिचान पक्षधर पार्टीपिनिगु संघीय गठबन्धनया रिले अनसनप्रति नेवाः समुदाय पाखें ऐक्यवद्धता क्यंगु भवलय् थथे धयादीगु खः । संघीय समाजवादी फोरम नेपालया वरिष्ठ नेता अशोककुमार राई सकल पहिचान पक्षधर सभासदपिनिं विरोध यायेक यायेक संसुं नश्लवादी नेतापिनिगु

बलजफ्तीया कारणं जनतायात थुज्वःगु समानता विरोधी संविधान घाके हःगुलिं थुक्रिया विरोध यायेगु सिबाय् मेगु विकल्प मदुगु धयादिल । संघीय गठबन्धन आन्दोलन नेवाः ऐक्यवद्धता कार्यक्रमया पाखें नेवाः आन्दोलनया न्हयलुवाः डा. महेशमान श्रेष्ठं ऐक्यवद्धता पत्र ब्वनाः अशोक राईयात लःल्हानादीगु खः । थ्व स्वयाः न्हयः काठमाडौंया असं बजारय् नेवाः न्हयलुवापिं व भाषिक कार्यकर्ता तथा साहित्यकारतसं वर्तमान संविधान धोका खः । नेवाः स्वायत्त राज्यया आन्दोलन जारी जुयाच्चंगु दु धकाः विरोध सभाय् न्ववाःगु खः । विरोधसभा लिपा अन मुनां च्वपिं



आन्दोलनकारीत ज्यालीया रुपय् खुल्लामञ्चय् ऐक्यवद्धता क्यनेत अनसनस्थल वंगु खः । २६ बुंदे माग तथाः जेठ २५ गतेनिसं सङ्घीय गठबन्धन न्ह्याकूगु तेश्रो

चरणया आन्दोलन अन्तर्गतया ३९ दिने रिले अनसनया २६सौ दिं वंगु असार १८ गते नं थीथी पार्टी व संघसंस्थाया प्रतिनिधितसं सहभागिता

क्यनाच्चंगु दु । खोटाङ जिल्लाय् असार १ गतेनिसं न्ह्याःगु सङ्घीय गठबन्धनया रिले अनसन भिंच्यान्हु १८ औं दिनय् नं जुयाच्चंगु दु ।



ज्ञाजलपा वाश्वो

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipur_sandesh@live.com

सम्पादकिय



आखिर वार्ता छाया मजुयाचन

जारी जूगु संविधानप्रति असहमति प्वंका संविधानयात पुनरलेखन यायेमा:गु थेंजा:गु गम्भीर माग तथा आन्दोलन याना वयाच्वंगु संघीय गठबन्धनलिसे ओली सरकार वार्ता यानाच्वंगु खने मद्दु । माग गम्भीर दु अले इमिगु जायज माग पुरा यायेगु धका: नं सार्वजनिक रुपं अभिव्यक्ति मन्त्रीतनिसे प्रधानमन्त्री तक बिइगु तर वार्ता धा:सा यानाच्वंगु अवस्था मद्दु । संविधान जारी याये न्ह्य: विशेष याना मधेसय् सुरु जूगु आन्दोलनया रुप कथं आ: वया तराई लागा जक मखु पहाडी व हिमाली लागायापि तक आदिवासी जनजाति, मधेसीनिसं उत्पीडित समुदाय मंका: कथं दना थ:पनिगु माग सम्बोधन मजुल धका: धयाच्वंगु अले संघीय गठबन्धनया आन्दोलनय् ऐक्यबद्धता प्वंकाच्वंगु अवस्थाय् नं सरकार वार्ताया माध्यमं समस्या समाधान यायेगु निति मा:गु कथं कुत: यानाच्वंगु खने मद्दु ।

छुखे मंसिर स्थानीय निकयया चुनाव यायेगु धका: घोषणा यायेगु अले मेखे सत्ता साभेदारी दलया दथुइ हे सरकार परिवर्तनया निति खेल म्हितेगु ज्या गुगु कथं जुयाचन थ्व घटनाक्रमयात स्वल धा:सा आ:या अवस्थाय् वर्तमान ओली सरकार वार्ताया माध्यमं समस्या समाधान यायेगु निति गम्भीर मजु धका: धायेफइगु अवस्था दु ।

वार्ताया माध्यमं समस्या समाधान यायेगु ज्या मजुयाच्वंगु अवस्थाय् कन्हय् वना त:धंगु लिच्व: लात धा:सा उकिया जिम्मेवारी स्वयं सत्ताय् दुथ्या:गु राजनीतिक पार्टीया नेतात हे जुइमालीगु अवस्था वइ । उकिं थ्व इलय् वार्ताया माध्यमं समस्या समाधानया निति राजनीतिक पार्टीया नेतातय्सं विशेष पहल यायेमा:गु अवस्था दु । वार्ताया माध्यमं समस्या समाधान जुल धा:सा जारी जूगु संविधान कार्यान्वयन यायेगु निति नं खास हे थाकुइगु अवस्था वइमखु धका: नं थुइकेमा: ।

साहित्य/हाईकु

बुद्ध जिगु मिखाय्

ज्ञानबहादुर महर्जन नेवा:

किपू

५. ज्याया दथुई
लुमनावई बुद्ध
दु:खया पार ॥

७. ज: ह्वलेभनं
ध्यानय् दुवी फयेमा
सत्कर्म यानां ॥

६. ज्ञान लायेगु
अ:पु मजु खनीसा
ध्यानं कायेय: ॥

८. सागरया ल:
विवेकशील ज्ञान
फुइमखु न्हाँ ॥

पिनेयापिनिगु मिखाय् नेवा:त



—महेशराज महर्जन—

नगां, किपू

थौं सुथय् जिगु छेंया न्ह्योने छेंय निदं न्ह्य:निसं बालं च्चनच्वंमह मिसानाप छें न्ह्योने जिमि कला खँ ल्हानां च्वंगु । छवा: कि वा:छि जक न्ह्य: बालं च्वं व:म्ह छम्ह मिजं नं व मिसानाप खँ ल्हात । इपिं निम्हं पश्चिमयापिं जुयाचन । अले व मिजं नं जिमि कला:यात न्यन — “दिदीले हाम्रो भाषा बुभ्नुहुन्छ ?” वं भाषा धका: पश्चिमया, भतिचा पा:गु खय् भाय् धा:गु जुया चन । जिमि कला: नं लिस: विल — “किन नबुभ्नु ? नेपाली भाषा जस्तै त हो नि ।” अले तुरुन्त हे व मिसां धाल — “दिदी त नेपालको कति ठाउँ पुगेर आइसकेको मान्छे, पश्चिमको डँडेलधुरा सम्म पुगिसक्नु भएको छ ।”

जि स्वला न्ह्य: ओखलढुंगाया हर्कपुर गाविसय् छगु ज्याय वना बलय् छखा छेंय, जि नेवा: धका: कना, तर छम्ह ब:मनी बुरी पत्या: मया: । छाया धालसा जिं खँल्हानागु नेवा: पह: मव: हं । अले वं स्वनिग:या नेवा:तय् वारे कन । वया छय् यलय् प्रौढ शिक्षा व्वंकीम्ह जुया चन, अले व बुरी नं १८ दं तक स्वनिगलय् च्वनां वने धुंक्मह जुयाचन । ओखलढुंगाया अप्व: मनूत कपनय् छें दयेका च्वनेगु या:, अले वया कायया नं अन छें दु । वयात वया छय् नं धाल हं —अन स्कूलय् व्वं वइपिं गुलि

मिसापिसं चाबहिल धा:गु गन धका मस्य हं । व बुरी ला अजु हे चाल हं कि काठमाडौंथें सुविधा सम्पन्न थासय् च्वनां नं आख: मस:पिं दुगु जुयाचन, अले चाबहिलया लें हे मस्युपिं दुगु जुयाचन । निदं मयाक न्ह्य: जि बाग्लुङ व बेनीइ वना, अले अनया छम्ह निम्ह मगत पासा जुल । छम्ह धोबीघाटय् च्वनां च्वंम्ह । जिमि मेपिं पासापिन्सं वयात “मामा” धाइगुलिं जिं नं “मामा” हे धायेगु याना । वया स्वनिगलय् ज्या ख: — बुं, जग्गा दया: नं लालपूर्जा मद्दुपिं, बुइ जग्गा अपो तर लालपूर्जाय् कम दुपिं, अले थ:गु बुं मचायेक हे मेपिनिसं नामय् यानां त:पिं नेवा:तयेत अड्डाया ज्या यानां बिया: लखलख धेवा कमे याये धुंक्मह । बेनीइ नाप लाये धुंका जिं बेनी थासं हयागु वयागु छगु सामान बियेत वयात नाप लायेत जिं फोन याना । वं थाय् कन — “म धोबीघाटमा बस्छु । धोबीघाट तपाईंलाई थाहा छैन होला । बल्खुवाट सानेपाबाट उता, नयाँ बाटोमा, रिङरोडमा ।”

थुपिं स्वंगु घटनां कयं, नेवा:तयेत स्वनिग: पिनेयापिसं गुगु मिखां स्वइ धका: ।

जिमि कला:यात भतिचा फरकगु खय् भाय् मथूमह जुइ धका: व मिजं नं विचार या:गु अथें मखु । आ नं भीथाय् यक्व मिसापिं, भी मापिं अले हजुर मापिं दनि गुपिं खय् भाय् मस: । न्हापा इमि सयेके हे म्वा: । थन हे थ:गु नेवा: समाजय् बुल, इमित मव्वकल, मव्वन । व्याहा नं थन हे जुल, लिक्क हे जुल । गनं तापाक वा मेगु जातियाके मजुल । आ प्रौढ शिक्षा व्वं वन, तर गुलि गुलिसं नं आख: स्यु, तर धा:गु मस्यु । तर आयापिं मिजं-मिसातसं यक्व व्वनां त:गु दु धयागु पिनेयापिसं मस्यु,

स्यु सां हेपे यायेत काइपिं नं मद्दु मखु । (जिमि वा व जिमि मचा बाहेक जिगु छेंय दक्व डिग्री पास जुउपिं ख: ।) अले जिमि कला:यात अथे धा:गु छाया नं धालसा व मिजं नं ह्याबेले वयात छेंय खं । मतलव, यदि जिमि कला: अफिस वनीम्ह जुउगु जुउसा वं अथे धाइमखु जुइ, छाया धालसा अफिस वंसा खय् भाय् ल्हाये मालिइ । ज्या मदया, अले ज्या याये मन मदया, भीत मेपिनिसं हेलाया मिखां स्वका: च्वने माल ।

अले, जित: धोबीघाट मस्यु धका: व “मामा” सोचे या:गु ? थ्व स्वनिग:या नेवा:त गनं नं वनी मखुपिं, छुं हे मस्युपिं धयागु भावना पिनेयापिके दु । वं मामा जिन्दगीइ काठमाडौं धा:गु मन्यनीबेले व हे धोबीघाटया लें जुया बुंगद्य: स्व:वनीगु वं छु स्यु ? तर वनाप ल्वानां च्वनां ला मजिल । थ्वयात जिं हेपे या:गु धाये, दवे या:गु धाये । इन्टर्नल माइग्रेन्टतसं आदिवासीतय् न्ह्याबलें हे हेपे याइ, छाया धालसा इमिसं थ:त जक स:स्यु तायेका, व आदिवासीतय्सं नं इमित हे स:स्यु धका धायेका जक हे इपिं थहाँ वये फइ, भीत क्वत छ्वये फइ ।

अन्तय्, स्वनिग: पिने नं नेवा:त दु, तर इपिं नेवा:त अथे मखु । वजारय् च्वनीपिं अले व्यापार याइपिं जुउगुलिं पिनेया यक्व नेवा:त धनी, आख: नं स:, अले चलाक नं । अले पिने श्रेष्ठ, प्रधान, शाक्य व मेमेपिं त:धं धागु जात यक्व दु, ज्यापुतय्सं अले मेमेगु चीधं धागु जातयापिसं थ:गु थर श्रेष्ठ, प्रधान हे तइगु । उकिं, जित: थये नं ता:, गनं थ्व दक्व भी मुक्कं नेवा:तय् मखु, वरु जि व मेमेपिं ज्यापुतय् जकं धा:गु मखु ला ?

किपू सा:गा: त्वा:या लिसा मिस आइकन

ज्वजलपा वा:पौ /

येंया राष्ट्रिय नाचघरय् असार ११ गते शनिवा: छगू समारोह दथुइ लिसा महर्जन उगु उपाधि त्याकादीगु ख: । रेक्स फेसन होम ग्वसा: ग्व:गु ज्याभवलय् १४ म्ह मेपिं प्रतिस्पर्धीतय् ल्यूने लाकूह महर्जन उपाधि टाइटल लिसं नगद १ लाख तका सिरपा नं त्याकादीगु ख: । वय्क: किपूया सा:गा: त्वा:याम्ह ख: । ज्याभवलय् र्थहितित्वा:या मयजु ज्योति मानन्धर फस्ट रनरअप जुयादीगु दुसा गद्वाघरया दिव्या महर्जन सेकेण्ड रनरअप जुयादीगु दु । मू निर्णायक नरेशवीर शाक्यजुया नेवा: छु ख: ? धइगु न्ह्यस:या लिसलय् नेवा: धयागु जात जक मखुसे राष्ट्रियता जूगु नेवा: धयापिं संस्कृति, तजिलजिया सुकां मा:हनात:पिं व नेवा: धयागु जिगु पूर्वक म्हसीका जूगु, नेवा: जुइखंगु हे छगू आशीर्वाद जूगु लिस: बिया: महर्जन उगु उपाधि त्याकेत ता:ला:गु ख: ।

भिन्याम्ह नेवा: मिस्तय्सं व्वति का:गु ज्याभवलय् न्हापांगु राउण्डय् भिंछम्ह ल्य:गु ख:सा अनलिपा ‘टप फाइभ’ धका: न्याम्ह प्रतिस्पर्धीपिं ल्य:गु ख: । टप फाइभय् ज्योति कपाली व उपमा शाक्यपिं ल्य:गु ख: । ज्याभव:या मू पाहां मोडर्न नेवा: इंगलिश स्कूलया प्रिन्सिपल लिसं नेवा: बस्ती नेवा: स्कूलया कजि दिपक तुलाधरजु जुयादीगु ख: । मू निर्णायक शाक्यलिसं मेमेपिं निर्णायकपिं मिस नेपाल इभाना मानन्धर, निर्णय श्रेष्ठ,



विजयरत्न असंबरे, पवन जोशी, रमेश मुनिकार व भिंतुना जोशीपिं च्वनादीगु ख: ।

ज्याभवलय् मिस बेस्ट हेयर व मिस क्याटवाकया टाइटल दिव्या महर्जन, मिस हेरिटेज एम्बेसडरया टाइटल अनिता डंगोल, मिस पर्सनालिटी, मिस ब्युटि विथ पप्रॉज व भ्युअर्स च्वाइसया टाइटल अनुशा शाक्य, मिस सिनसियर पुजा मास्के, मिस बेस्ट फिगर लिसा महर्जन, मिस पपुलर रुपा खर्बुजा, मिस बेस्ट स्माइल आयुष्मा श्रेष्ठ, बेस्ट स्किन व मिस फोटोजेनिक सृष्टि शाही, मिस कल्चरल एम्बेसडर स्वर्णिमा मानन्धर, मिस डिसिप्लिन व बेस्ट ड्रेस ज्योति मानन्धर, मिस कनिफडेन्ट ज्योति कपाली, मिस मल्टिमिडिया उपमा शाक्य, मिस बेस्ट नेपालभाषा प्रशंसा डंगोल, मिस फ्रेन्डशिप व मिस ट्यालेन्ट कृति राजभण्डारी व मिस चार्मिडया टाइटल पर्सा महर्जन त्याकेत ता:ला:गु दु ।

किपुली न्हूगु मोटरसाईकल वर्कशप चाल

ज्वजलपा वा: पौ /

थौकन्हे ल्याय्म्ह ल्यासेतयगु निंति मोटर साईकल मदय्क मगा:गु सवारी साधन जुइधुंकल । सायद मोटरसाईकल मदुगु छँ किपुली माले थाकुई धुंकल ।

मोटर अप्ठ: दया:वलसे मोटर साईकल मर्मत याइगु वर्कशपत चायेकेगु नं अप्ठ:या वयाच्वंगु दु । थ्वहे भवलय् म्हाग: सनिवार किपुली छगू मोटरसाईकल वर्कशपया उलेज्या जूगु दु ।

किपूया न्हवजार हनुमानघाट जुया पांगा वनेगु लैय् अर्थात बाघभैरव सहकारीया न्ह्योने First Gear Service and Parts नांया मोटरसाईकल वर्कशप चायेकूगु दु । मोटरसाईकल वर्कशप ला यक्व थासय् दयेधुंकूगु दु । उगु वर्कशप स्वया थ्व वर्कशपया बिस्कं च्छाय् बह:गु यक्व खँत दु ।



मेकानिकल इन्जिनियरनिसं कया: इलेक्ट्रोनिक इन्जिनियर दुध्यागु थुगु वर्कशपय आधुनिक Tools व Equipment दुगु नापं थन ज्यायाइपिं दक्ष व तालिम प्राप्त Technician तसैं मर्मत याइगु ।

वर्कशपया छम्ह पार्टनर जनक महर्जनया कथं थुगु संस्थाया त:धंगु आज्जु धइगु मोटरसाईकल वर्कशपय् ज्या याइपिं मेकानिकपनिगु हैसियत थकायगु ख: । थौकन्हे मोटर साईकल मेकानिकपिन्त समाजं उलि इज्जत बिइगु मया: । थ्व ज्या याइपनिगु जीवनस्तर थकायेगु हे मू उद्देश्य ख: ।

थ्व वर्कशप चा:गु लसताय् श्रावण महिना ज्व:छि मोटरसाईकल सर्भिस याकीपिन्त निस: जक धेवा कायेगु व मोबाइलय् नं सच्छि धेवा क्वकया: बिइगु धा:गु दु ।

क्रिएटिभ स्कूलय् हना: व विदाई



पलिस्था जूगु म्हो इलय् हे थ:गु म्हासिइका विइत सफल जूगु किपूया नांजा:गु क्रिएटिभ एकेडेमी एसएलसी-२०७२य् थ:गु स्कूल पासजूपिं विद्यार्थीपिन्त हनेगु नापं विदाई विल ।

म्हाग: असार २५ गते सनिवा: थ:गु हे हलय् छगू त:जिक कार्यक्रम यानां हंगु ख: । विद्यालय व्यवस्थापन समितिया नाय: मर्जिमान सिंहया नाय:सुइ जिल्ला शिक्षा कार्यालय काठमाडौंया निरीक्षक दामोदर रेग्मीया मूपाहाँसुइ न्ह्यागु उगु ज्याभवलय् मेपिं पाहापिं श्रोत व्यक्ति वासुदेव रेग्मी, प्रिन्सिपल वि.एन. पौडेल, प्रा.डा. धर्मरज डंगोल, जनाधार क्याम्पसया अध्यक्ष माधवलाल महर्जन, जनसेवा उच्च मा.वि.या प्राचार्य

नन्दकुमारी महर्जन, मङ्गल बहुमुदी क्याम्पसया क्याम्पस प्रमुख प्रदिप महर्जन लगायतया उपस्थिति दुगु ख: ।

स्कूलया शिक्षिका रिना शाही न्ह्याकूगु उगु ज्याभवलय् लसकुस न्वचु प्रिन्सिपल वि.एन. पौडेलं बियादीगु ख: । थ:गु खँ तयेगु भवलय् पौडेलं २०६५ सालनिसं २०७१ सालतक न्हयगु ब्याचय् जम्मा १९४ विद्यार्थीपिन्सं एसएलसी जाँच ब्यूगुली १३४ म्ह डिस्टिंगसन व ६० म्ह फस्ट डिभिजनं पास जूगु खँ कनादिसं थ:गु स्कूलया शैक्षिक गुणस्तर थुकिं हे क्यनाच्वंगु दु धयादिल ।

अथे हे थुगुसीया न्हूगु प्रणाली कथं ग्रेडिङ प्रणाली या:गु परीक्षाय् नं ए+ २५, ए ३०, बी+ २ पास जूगु, गुकी जीपिए

३.९० निसं ३.९० तक दुगु खँ कनादिल ।

जिपिए ३.९० ल्या हयेत ता:ला:म्ह अशोक बुढायात स्व.रामचन्द्र -बुलकुमारी शिरपा: देछात । अथेहे जिपिए ३.८५ ल्या: हयेत ता:लापिं स्वम्ह रक्षा विस्ट, रोजश्री ढकाल व श्रवण ढुंगानायात शिक्षक शिव प्रसाद गिरी थ: मांअबुया नामय् निस्वना त:गु विर-रत्न शिरपा: विल । अथेहे न्यादं न्ह्य:निसं छन्हु हे गयल मजुइक स्कूलय् आख: व्वंका च्वनादीम्ह शिक्षिका सरिता श्रेष्ठयात नं नगद पुरस्कार ल:ल्हागु ख: ।

उगु ज्याभवलय् मू पाहाँ दामोदर रेग्मी, माधवलाल महर्जन, शिक्षक परशुराम खनाल, विद्यार्थीपिं वर्षा अधिकारी, अशोक बुढापिन्सं थ:थ:गु खँ तयादीगु ख: ।

नेवा: पत्रकार राष्ट्रिय दबूया भावि योजना तयार याना बैठक क्वचाल



ज्वजलपा वा:पौ /

नेवा: पत्रकार राष्ट्रिय दबूया न्हापांगु पूर्ण बैठक वंगु असार १७गते शुक्रवा: व १८ गते शनिवा: निन्हुयंकं नगरकोटय् च्वना क्वचा:गु दु । न्हापांगु चरण व निगूगु चरण याना न्ह्याकूगु उगु बैठकय् नाय: श्रीकृष्ण महर्जनं नेवा: पत्रकार दबूया अवधारणा नापं नीतिगत खँ तयादीगु ख:सा न्वकू सुरजवीर बज्राचार्य दच्छिया कार्ययोजना अले मूख्याञ्जे सुनिल महर्जनं सांगठनिक संरचनाया प्रस्ताव न्हयब्वयादीगु ख: ।

उगु कथं न्वकू व मूख्याञ्जे तयादीगु प्रस्तावयात कया स्वंगु पुच: दयेका सहलह ब्याके धुंका: निष्कर्षय् थ्यंगु ख: । बैठकं अनुगमन विभागया कजिइ नृपेन्द्रलाल श्रेष्ठ, मिसा विभागया

कजिइ मिरा राजभण्डारी, प्रशिक्षण विभागया कजिइ सुरजवीर बज्राचार्य, सूचना तथा संचार विभागया कजिइ सुनिल महर्जनयात व आर्थिक विभागया कजिइ सुरेन्द्रभक्त श्रेष्ठयात ल्य:गु दुसा ल्यंदुगु विभागया कजिपिं सचिवालयया बैठक च्वना क्व:छिइगु जूगु दु । विभागय् दुज:पिं तया पूर्णता बिइगु ज्या नं आ: सचिवालयया बैठक च्वना याइ धा:गु दु । बैठकं केन्द्रीय दुजलय् विजयलाल कर्माचार्य (काभ्रे), राजेन्द्र शाक्य (यल), उत्तम श्रेष्ठ (गोरखा) व शोभा श्रेष्ठ (यँ)यात मनोनित या:गु दु । उगु हे कथं यँ, यल व ख्वप जिल्लाया नाय:पिन्त पदेन दुज: कथं ल्य:गु दु । अथे हे मेपिं केन्द्रीय दुज:पिं ल्ययेगु भाला सचिवालययात बिउगु

दु । बैठकं पुस्करभक्त माथेमा, सुरेश किरण मानन्धर, रमेशकाजी स्थापित, राजु शाक्य, नरेशवीर शाक्य, सुजिव बज्राचार्य, विजयरत्न असं बरेपिन्त सल्लाहकार कथं ल्य:गु दु । दच्छिया दुने नेवा: पत्रकारतयगु किपा, फोन नापं इमेल तकं दुगु डायरी पिकायेगु, देय्क्यंकया एफ एमय् थ्वयेकेगु कथंया खय् भाय्या माध्यमं नेपालभाषा स्यनेगु ज्याभूव: निर्माण यायेगु, लगायतया ज्या यायेगु निर्णय या:गु दु । बैठकय् वंगु वैशाख ११ गते लोकतन्त्र दिवस खुन्हु किपुलिइ जूगु निक्क:गु त:मुँज्याय् निर्वाचन मण्डलय् च्वनादीपिं बरिष्ठ पत्रकारपिं माथेमा व मानन्धरयात नाय: महर्जनं सुभाय् पौ तकं ल:ल्हानादीगु ख: ।

पत्रकारिता क्षेत्रयात समावेशी दयेकेमा:

मुलधारया पत्रकारिता समावेशी व मातृभाषाया पत्रकारिताया निंति राज्यं ठोस पहल यायेमा:गु खँय् सरोकारवालातय्सं व: बियादीगु दु । नेवा: पत्रकार राष्ट्रिय दबूया न्हू निर्वाचित जुयादीपिं पदाधिकारीपिन्त भिंतुना बिइगु निंति स्वाभिमान लय्पौ व जनधारणा वा:पौपाखें शनिवा: यलय् या:गु ज्याभवलय् अथे व: बियादीगु ख: ।

नेपाल प्रेस काउन्सिलया अध्यक्ष बोर्णवहादुर कार्की मूलधारया पत्रकारिताय् फूक्क जाती व भाषाभाषीया पहुँच, प्रतिनिधित्व व अपनत्व ब्वलंकेगु निंति काउन्सिलं ठोस पहल यायेगु प्रतिबद्धता प्वंकादीगु ख: । नेवा: पत्रकार राष्ट्रिय दबूया केन्द्रीय नाय: श्रीकृष्ण महर्जनं नेपाली पत्रकारिता समावेशी दयेकेगु निंति, मातृभाषाया पत्रकारिता व दक्ष पत्रकार उत्पादनया निंति पत्रकार दबू क्रियाशील जुइ धयादिसं दबू पेशागत सवाल व पहिचानया सवालयात कया नाप नापं ल्हवना वनेगु जुइ धका: धयादिल ।

ज्याभवलय् नेपाल मिडिया सोसाइटीया अध्यक्ष पुष्करलाल श्रेष्ठ, रातोपाटी डटकमया सम्पादक एवं नेपाल पत्रकार महासंघया पुलांम्ह महासचिव ओम शर्मा, सगरमाथा टेलिभिजनया अध्यक्ष निर्मल गुरुङ्ग, नेवा: पत्रकार राष्ट्रिय दबूया केन्द्रीय सल्लाहकार नरेशवीर शाक्य, स्वाभिमान नेपालया प्रबन्धक राज्यलक्ष्मी शाक्यपिन्सं मातृभाषाया पत्रकारिता व सम्बन्धित जातजातिया मुद्दायात राज्यं गम्भीर रुपं कायेमा: धका: धयादीगु दु ।



साहित्य/चिनाखँ

ग्रह दशा

नाति महर्जन
चोचपा, पाँगा

भीगु देसय नकतिनि प्रजातन्त्र वःगु
नेपाःमितयुत धाथें दशां कःगु
थजाःगु लुटतंत्र यात हे प्रजातन्त्र धकाः
नेतातयसं जनतायात भंगः लानातःगु ॥
आः हानं देसय गनतंत्र वल धाःगु
रुस चीनथें यक्व देश विकास जुइ धाःगु
ग्व निइदँ दत मेलम्चीया लः त्वकें मफु
रुस चीनथें विकास नेपाः गबले जुइगु ॥
नेपालय न्हूगु संविधान वःगु
विश्वय दकले बांलागु धाःगु
ग्व व संविधानं सकसित कयपुइ फुगु
बच्छि जनता हे चित्तबुझें याये मफुगु ॥
९० प्रतिशतं समर्थन याना दयकल धाःगु
न्हूगु संविधान नेपाः यागु
राष्ट्रपति सार्वजनिक याखुनुनिसें हे
५१ प्रतिशत जनतां बहिस्कार याःगु ॥
गुखुनु संविधान सार्वजनिक जुल
उखुनुनिसें संसद सभाय अवरोध जुल
विरोधीतयसं सभा बहिस्कार याना
न्हिंथथें हे सभा भंग याना बिल ॥

बहिस्कारवादीत आन्दोलनलय कुहाँवल
देशय हानं महाभारत लडाईथें जुल
तराईया जनतां न्हूगु संविधान याना
द्वपातय तथा मि च्याका बिल ॥

तराईले आन्दोलनया मि फैलय जुल
स्व स्वथाय तोडफोड व हिंसा जुल
पुलिस सेनातयगु हे वास्ता मयाःसे
मि प्याः ज्वना जनतां ज्यान पानाजुल ॥

नेतातसें आन्दोलन चर्को यायेगु स्वल
शान्त यायेगु पल्सा ल्वाकेत प्रलोभन बिल
मनूया मू ५० लाख तोकय याना
सिकसिक गरिवतेत आन्दोलने हल ॥
थ्व देशद्रोही नेतातसें सकुनि चाल म्हितल
धेबाया लोभ क्यना जनता हेका तल
भी सोभा जनतायात आन्दोलनय हल

मूहाम्ह दुगुथें स्यायगु स्वल ॥
फुक्क थासय नं आन्दोलनया मि ग्वानावल
स्वस्वथाय मनु स्याना हि बाः बल धाल
थपायसं देसय जनता सिनां दुईशा जुल नं
जनताया सरकार धाम्ह वास्ता हे मयाः ॥
गुलिसियां कमाय याना नकिम्ह काय सित
गुलिसित अपाङ्ग जुइक गोलि कल
आन्दोलनया नेतात राजधानी च्वना
गरिव जनतायात पशु थें स्याका तल ॥
तराईया जनता दक्क दनावल
सकभनं आन्दोलन मिच्याना वल
भाला कथि हतियार ज्वना पिहाँवःपिन्सला
पुलिसया हाकिम नाप स्याना बिल ॥
तराईया जनतां नाकापतिं धर्ना बिल
नाकाबन्दी याना देशय हाहाकार यानातल
दैनिक उपभोगया वस्तु अभाव जुल
जनताया दैनिक जीवनय असर जुल ॥
पेट्रोल, ग्यास गनं कायेथाय मदु
दवल भावं थिके जुल सामान नये त्वनेगु
गरिव जनतां लः उलि हे क्वाका त्वनेमखं
नये त्वनेगु तालाकेत मतितेल ग्यास
आः गन का वनेगु ॥
दँय छकः तिन्ख्यलय नेतात मुनि
प्रजातन्त्र दिवस धकाः तमासा क्यनि
प्रजातन्त्र धाःसा सिंह दरवारे दुने तथा
थुमिसं आःतक तानाशाही यानाच्वन ॥
शाह पालय्या पंचायति प्रजातंत्र धाःगु
आः कांग्रेस कम्युनिष्टया गनतन्त्र धाःगु
छुं हे मचा जनताया लागि नां जक पाः
थुमिसं जनतायात दुःख याना तःगु ॥
थुपिं दानव सिबें नं ग्यानापुपिं
देश व जनता नासयाः वःपिं
थुपिं सिंहदरवारे च्वना सलामी फया
जनताया मलामि स्व स्वं लयताना च्वपिं ॥
बिनास जुजुं क्वय क्वय वन
नेतात विकास यायां च्वय थाहाँवन
देश विकास याइला धकाः आशायाःपिन्स)
देशया धुकु हे खालि जुइक लुते यानाच्वन ॥

जन्मलिसे सिनांच्वंगु
जीवन



—प्रशान्त महासागर—

जन्म कया, मनू धाल
ना छुत, लिङ्ग कथं काय धाल ।

म्हिता म्हिता जीवन हना
मचा जुया, सुनानं छु मधा ।

भत्चा ई नं त्वता वन ।
ज्याः कृवि माल,
भात धाईमह दत
ईनापं
अबु धाईपिं नं दत ।

कचाःकिचाः याना
वुँइ सःगु सिबें अप्व
थुइमाःगु अवस्था
त्वनेगु ज्याखँ गतां चफुक्क ज्वना हल ।

थौं कन्हे धा धां
वाज्या धाईपिं लँ पनाः हल
म्वायगु ई अथेंतु फुना वना च्वन ।

स्वयंबलय जीवन जिगु
खालिगु भवःथें च्वसाः
थःगु खँ इच्छा च्वयगु थाय थौं मखँना
जन्म कयागु खँया धापू मथुसं
पाः हिलेगु
लँपुई जीवन लात
छु...
मूनया जीवन थुलियाःगु नितिं जक खःला ?

नेवाः नेतात गन दु ?



कवि राम महर्जन,
नगां, किपू-१६

नर्मदेश्वर प्रधानं न्यना दिल
उपत्यकावासी नेवाः नेतात ग्व गन ?
वकिल शंकर लिम्बुं धया दिल
काठमाडौंया नेवाःतयत चौतर्फी आक्रमण ॥

यें, यल, ख्वप स्वंगु शहरय च्वंगु
ऐतिहासिक सम्पदात फुक्क धेथें
बहतरया तःभुखाचं ध्वस्त याना बिल
थ्व प्राचिन महत्वया सम्पदात ॥

दयेकेगु ताः मलानी थ्व दय्के मफुतकी
जुइ भीपिं छयों मदुपिं मुरकट्टा थें
सत्ताय च्वपिं गैर नेवाः नेतातसें
खनेमदु खास च्यूताः कयाच्वंगु ॥
शहरी विकासया नामय
लँ तःब्या यायगु नामय आदिवासी
जनतातयगु छें थुनेगु यात
बुँ नं अधिग्रहण यायेगु यात ॥

थनच्वपिं आदिवासीपिन्त
बुलुहुं विस्थापित याना छवयगु
तर काठमाडौंवासी नेवाः नेतात
थ्व विषय म्हुतुई धौ फिनाच्वंगु दु
छायथें लिसः बियाः दिइत इनाप याना च्वना ॥

छिं नं चिनाखँ, च्वसू च्वयादिसँ ज्वजलपा वाःपतिइ पिकायेगु नितिं छवया हयादिसँ

तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वाःपौ व ज्वजलपाः वाःपौया ग्राहक जुइगु नितिं स्वापू तयादिसँ

कार्यालयः निखासी टोलः कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वाःपतिइ छिगू चिनाखँ/बाखं/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंकाः सः



ज्वजलपा वाःपौ

ज्याकूः निखासी त्वाः किपू नपा-३ फोन ल्याः ४३३३००७,
९८०८६२६४२० ई-मेल : kirtipur_sandesh@live.com

अन्धविश्वासय् लिकुनाच्चंगु विज्ञान



(नेवा:तय्सं न्हापानिसें थथे याये मत्यः अथे याये मत्यः धका: धया वयाच्चंगु दु। थौ वया उकियात अन्धविश्वास धायेगु या:। याये मत्यः धयात:गुया थीथी कार णत दु। उगु कारणयात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय् लिकुनाच्चंगु विज्ञानयात कया सफू हे च्यादीगु दु। सं)

द्य:यात पुजा यायेमा:

भीगु सामाजिक व धार्मिक मान्यता कथं द्य:यात पुजा यायेमा: धयागु दु। पुजा थी थी कथं यायेगु याना वयाच्चंगु दु। पुजाव:भु छपातय् जक पुजा तया: याइगु निसें क्वत:, कल: आदी तया: याइगु नं दु। साधारण कथं जाकिं पुज्याना: याइगुनिसें होम जग्गे व स्वना: नं पुजा यायेगु या:।

द्य:धयाम्ह मानय् याये मा:म्ह ख:। द्यवं रक्षा याइ, भियाइ, सुख शान्ति व धन दौलत आदि वी धयागु मुल्य मान्यता दु। थज्यागु मुल्य मान्यता कथं स्वीस्वक्व:ति द्य:पिं दु धयागु खँ धर्म ग्रन्थय् न्हयथनात:गु दु।

द्य:पिनिगु बारे थी थी कथंया बाखं हनात:गु दु। द्य: शब्द भीगु मुल्य मान्यता कथं शान्त स्वभाव व करुणा दृष्टि ख:। द्य:पिनिगु हरेक बाखनय् नं थज्यागु हे कथं या खँ न्हयथनात:गु दु। द्य:पिनि भक्ति भावयात धायेव धर्मलाई धयागु भावना दु। पुन्य दइ धयागु

विश्वास दु। थज्यागु भावना व विश्वासं थाय् थासय् द्य:पिनिगु मूर्ति तया: पुजा आजा यायेगु यानावयाच्चंगु दु।

द्य:धयाम्ह शान्त, शुशिल व करुणा जा:म्ह धयागु भावनां द्य:पिन्याय् वने बलय् द्य:पिनिगु थज्यागु स्वभाव लुमना वइगु स्वभाविक ख:। थुकिं याना: मनय् छुं कथंया क्लेस, रिस, राग, कुभावना आदि मदया: मन याउँसे च्वनी, म्ह हलुका जुइ। थज्या:गु अवस्था धयागु जिउयात आनन्द बिया: उसाय् बांलाकेगुया लक्षण ख:।

सुनं प्राणिया स्वभाव वयागु संगत व थाय्था परिवेसय् निर्भर जुइ। बांला:गु संगतं भिनी, बांमला:गु संगतं स्यनी। थाय् अनुसार आचारण जुइ। फोहर, दुर्गन्धित व ल्वापु जुयाच्चनीगु थासय् च्वनीम्ह फोहरी व हारां जुइ। बांला:गु व शान्तमय वातावरणं दिमागय् भिं भिंगु खँ लुइकावी। बांला:गु विचा हयावी।

शान्त, शुशिल व करुणां जा:पिं द्य:पिनिगु प्रतिमा तयात:गु थासय् स्वच्छ व बांला:गु वातावरण जुया: यचुपिचु जुया च्वनेमा:। यचुपिचु धयागु अथें जुइमखु। सुनानं यायेमा:। ध्वनं छगू ज्या ख:। ज्या याइम्हसिया नये दयेमा:गु मानव अधिकार ख:।

ज्या याइम्हसित नकेगु मानव धर्म ख:। मन शान्त यायेत द्य:याथाय् वपिसं यचु पिचु या:म्हसित नकेगु धर्म तायेकल। ध्वया लागि इमिस फूथें चा:थें थ:पिंके दुगु वस्तु वयात देछात। स्वां सिनखं छायेपिया: वातावरण बांलाकेगु यात।

गुबले गुबले यचुपिचु याइम्ह मदइ बलय् छुं नं थल आदिइ तयाथकेगु यात। थज्यागु कृयायात हे द्य:पुज्यायेगु धयात:गु ख:। ध्व छगू यचुपिचु याइम्हसित मानय् यायेगु ख:। पुज्यायेगु धयागु सम्मान यायेगु ख:। यालनिसें अन्नह्वला: गुबलें सम्मान यायेगु जुइमखु। नयेमा:गु अन्नयात अपमान यायेगु ख:। ध्व छगू विकृति ख:। भी पुर्खापिसं अन्नयात ह्वला: द्य:पुज्यायेगु



पन्नारत्न महर्जन

ज्या याइम्हसिया नये दयेमा:गु मानव अधिकार ख:। ज्या याइम्हसित नकेगु मानव धर्म ख:। मन शान्त यायेत द्य:याथाय् वपिसं यचु पिचु या:म्हसित नकेगु धर्म तायेकल। ध्वया लागि इमिस फूथें चा:थें थ:पिंके दुगु वस्तु वयात देछात। स्वां सिनखं छायेपिया: वातावरण बांलाकेगु यात। गुबले गुबले यचुपिचु याइम्ह मदइ बलय् छुं नं थल आदिइ तयाथकेगु यात। थज्यागु कृयायात हे द्य:पुज्यायेगु धयात:गु ख:।

धयात:गु मखु। यचुपिचु याइम्हसित नकेगु कथं यानात:गु ख:।



स्वनिग:या आदिवासी नेवा:तय्गु थीथी कथंया जीवन्त संस्कृति मध्ये छगू महत्वपूर्ण कथं नालात:गु दु गथांमुग: नख:।

दैय् दसं दिलागा च:हे खुन्हु हनीगु थुगु नख: नाप स्वापू दुगु गथांमुग:यात थीथी कथंया व्याख्या याना वयाच्चंगु दु। गथांमुग:यात त्रिशक्ति त्रिपद भैरव, शिवया प्रतिक, अर्धनाटेशवर, उमामहेश्वरया प्रतिक जक मखु धण्टाकर्ण धका: तर्क धायेगु याना वयाच्चंगु दु। गथांमुग: नख: भिंप्पंगूगु शताब्दीया इलनिसें हे न्ह्याका वयाच्चंगु नख: ख: धका: तर्क धया वयाच्चंगु दु।

गथांमुग: नख:या दियात तान्त्रिक विधिया ल्याखं तसकं महत्वपूर्ण दिं कथं नं नालात:गु दु। उकिं तत:धंगु सिद्धि जुइगु दिं धका: नं नालात:गु दु।

तसकं कडागु दिं कथं नालात:गु गथांमुग: च:हे खुन्हु स्वनिग:या गां गामयनिसें त्वा: त्वाल्य तर्क गथांमुग: दयेका वाये यंकेगु यानाच्चंगु दु। गथांमुग: च:हे खुन्हु चिचीधीपिं मस्तयत नैयागु कलि न्ह्याकेगु, तत:धीपिन्सं पञ्चधातु नैं, ली, सिज:य अंगू तर्क न्ह्याइगु चलन दु। कडागु दिं जूगुलिं भूतप्रेतं थिइ मफयेमा: धका: अथे अंगू न्ह्यायेगु व कलि न्ह्याकेगु याना वयाच्चंगु दु।

सिनाज्या क्वचायेकीगु गथांमुग: नख:

श्रीकृष्ण महर्जन



गथांमुग: दयेका वाये यंकीगु चलन

यैया थाय् थासय् दुवातय् गथांमुग: थना तइगु चलन दु। अले हा:ना: मदुम्ह छम्ह मचायात गथांमुग:या लाग्ना धका: उगु थासय् छैंय छैंय नापं पसलय् पसलय् तर्क छवया अजाजय् हा: धका: हायेका ध्यवा फुवके छवइगु चलन दु। अले उम्ह मचायात हे गथांमुग: क्व:थयेके बिइका: देशं पिने अर्थात बस्तीं पिने तक लुया यंका: गुसिइ चुइके यंकीगु चलन दु।

गथांमुग: दयेकेगु नितिं स्थानिय मनूत हे सक्रिय जुइ। गनं न्हयपं कथिया स्वपा तुति दयेका गथांमुग: दयेकीगु चलन दुसा गनं गनं छवालीया नं गथांमुग: दयेकीगु चलन दु।

हासाय् रंगं लाखेया ख्वा:पा: थें जुइक च्वया गथांमुग: धका: तयेगु नाप नापं

लैगिक रुपं नं अज्व: याना मिजंम्ह धका: सीदयेका अथे कलात्मक कथं गथांमुग: दयेकेगु याइ। उलि जक मखु न्हापा न्हापा जूसा मिसा मस्तयसं काप:या भम्चा दयेका म्हितीगु चलन दुगु इलय् अज्व:पिं भम्चायात गथांमुगल्य् खाये यंकेमा:गु चलन तर्क दुगु ख:।

अथे दुवातय् दुवातय् दयेकूगु गथांमुग:यात गनं गनं च्याका छवइगु चलन दुसा गनं गनं खुसिइ चुइका छवइगु चलन दु। अथे गथांमुग: यात लुया यंकीगु इलय् मिजं मस्तयसं न्हयपं कथिं दाया वनेगु नं चलन दु।

अले खुसिइ चुइका वये धुंका: वा वांछवया वये धुंका: गनं गनं ला छगू कथं मिजं मस्तयसं नारा लगेयान वाइगु चलन दु। अथे गथांमुग: लुया: यंका: वइगु यात हे दुवातय् च्वम्ह भूत वाये यंकीगु ख: धाइ। अर्थात गथांमुग:यात भूतया प्रतिक बिया मचंगु नं मदुगु



मखु। अज्व: याना गां गामय् अज्व:गु चलन आ: तक नं ल्यंदनि। इपिं मिजं मस्तयसं प्वा:स्या:पीस्या: मयो मयो, छयस्यां प्यस्या: मयो मयो धका: नापं थ:गु स्वास्थ्यय् बांलायेमा:, विकर अर्थात ल्वय् मवयेमा: धका: नारा लगे याना वइगु ख:। उगु कथं हाला वये धुंका: थ:थ:गु वस्तीइ दुने च्वंगु पुखुलिइ म्हिता: अर्थात लालकया (धरब्बाना) वा ख्वा: सिला जक छेंय् दुहां वनेमा:गु चलन दु। कथंहं..

धरानय् न्हापांखुसि नेवा: संकिपा नखः क्वचाल



विराजकाजी राजोपाध्याय
सुनसरीया धरानय्
न्हापांखुसि नेवा: संकिपा नखःया
ग्वसा: ग्वःगु दु ।

नेवा: फिल्म सोसाईटी व
नेपाल सरकार चलचित्र विकास
बोर्डया मंका: ग्वसालय् व नेवा:
फिल्म सोसाईटी, सुनसरी जिल्ला
कचाया कजिसुइ धरानस्थित
सैनिक भवनय् 'नेवा: संकिपा
नखः ११३६ व NFS संकिपा
सम्मान' ज्याभवः क्वचा:गु खः ।
संकिपा नखलय्
नेपालभाषाया म्यूजिक भिडियोत,
चिप्याखंत प:खा:, ईया वाखं,
मुद्दाया लिसं धरानया हे
सिनेक:मि, कलाकारत जाना:
दयेकूगु संकिपा निनि नं क्यंगु
खः ।

व स्वयां न्ह्यः, महोत्सवया
औपचारिक उलेज्या ज्याभवलय्
धरानया नाटक व संकिपा ख्यःया
न्हापाम्ह नकिं शारदा शाक्य व

वरिष्ठ कलाकार प्रेम सुब्बायात
...NFS संकिपा सम्मान'पाखें
हंगु खः ।

सम्मानित कलाकारपिन्त
ज्याभवःया मूपाहां नेवार एकता
समाज धरानया संस्थापक नायः
राजेशमान श्रेष्ठं खादां न्ययेका:
हनापौ लःल्हाना: हंगु खः ।

उगु हे ज्याभवलय् सोसाईटी,
सुनसरी जिल्ला कचाया
पदाधिकारी अले दुजःपिन्त
दसिपौ नं लःल्हाना:गु खः ।

सोसाईटीया केन्द्रिय नायः
लुजः सिंहं कचाया पदाधिकारी
अले दुजःपिन्त दसिपौ
लःल्हानादीगु खः ।

नुरा:खँ तयेगु भवलय् नेवार
एकता समाजया संस्थापक नायः
श्रेष्ठं आ: संकिपाया माध्यमं यें
व सुनसरी दथुइ स्वा:गु स्वापू
अभ् क्वातुका यंकेमा:गु
धयादिल । आदिवासी जनजाती
चलचित्र महासंघया नायः अमृत

सुनुवारं मोफसलय् नं नेवा:
संकिपा नखः ज्याभवः जूगुलिइ
लसता प्वकुसं आदिवासी
जनजाति संकिपा व
संकिपाक:मिपिनिगु हक अधिकार
या निम्ति थ:पिं क्रियाशिल
जुयाच्चनेगु धयादिल ।

अथे हे चलचित्र विकास बोर्ड
अन्तर्गतया आदिवासी जनजाती
मातृभाषी चलचित्र प्रवर्द्धन
समितिया दुजः अरुणकुमार
प्रधानं आ: राज्यं नं आदिवासी
जनजाती चलचित्रया महत्व
थुइकाहःगु व ल्हातय् ला:गु
उपलब्धीयात संस्थागत याना
यंकेमा:गु धयादिल ।

सभापतिया थासं नेवा:
फिल्म सोसाईटीया केन्द्रिय नायः
लुजः सिंहं आ: नेवार संकिपात
यें केन्द्रित मजुसे, देय्या
कुं कुलामय् तक्क थ्यंकेत
सोसाईटीपाखें पला: न्ह्याकेगु
धयादिल ।

नेवा: संघर्ष निरन्तर रुपं न्ह्याकेगु नितिं याकनं हे मेगु तःधंगु ज्याभवः

संघीय गठबन्धन
आन्दोलन-नेवा: ऐक्यबद्धता
पुचःया विहिवा: च्वंगु मुँज्यां नेवा:
हक अधिकार सुनिश्चितताया
नितिं नेवा: अधिकार सवैधानिक
रुपं सुनिश्चित यायेगु नितिं
वर्तमान राजनीति आदिवासी
जनजाति व नेवा: आन्दोलनयात
कया: प्रशिक्षण ज्याभवः यायेगु
निर्णय या:गु दु ।

नेवा: ऐक्यबद्धता पुचःया
संयोजक डा. महेशमान श्रेष्ठया
सभापतित्वय् जूगु उगु मुँज्यां
येंया १ वडानिसं ३५ वडातक
लिसं थीथी नेवा: समुदायदथुइ
थुकथं प्रशिक्षण ज्याभवः यायेगु
निर्णय या:गु खः । अथेहे उगु
मुँज्यां यें महानगरपालिकां घर-
जग्गा कर थका:गुलिं विरोध
यासं थुकियात कया: मा:गु
ज्याखं न्ह्याकेगु नितिं ऐक्यबद्धता
पुचःया दुजःपिं सत्यनारायण



डंगोल, रोजिन स्थापित व
पंचनारायण महर्जन दूगु समिति
नीस्वंगु दु । ज्याभवलय् यें मनपां
तिंख्यः क्वय् भूमिगत पार्कींग
दयेकेगु लिसं तिंख्यः लागाय्
थीथी कथंया विकास निर्माणया
ज्याखंयात नेवा: सरोकार क्यनेगु
नितिं दीपक तुलाधर, नमस्ते
सायिम व पवित्र कसा: दूगु
समिति नीस्वंगु दु । उगु मुँज्यां
संघीय गठबन्धनया आन्दोलनय्
नेवा: ऐक्यबद्धता निरन्तर क्यनेगु

नितिं गठबन्धनं तिंख्यलय् याना:
वयाच्वंगु रिले अनसनया समापन
ज्याभवलय् सक्रिय रुपं ब्वति
कायेगु निर्णय या:गु दु । नेवा:
ऐक्यबद्धता पुचःया म्हिग:
विहिवा: च्वंगु थीथी समितिया
मंका: मुँज्यां वंगु असार १८ गते
जूगु नेवा: ऐक्यबद्धता ज्याभवःया
समीक्षा यासं नेवा: संघर्ष निर-
न्तर रुपं न्ह्याकेगु नितिं याकनं
हे मेगु तःधंगु ज्याभवः यायेगु
क्वःछयूगु दु ।

दिपय् मतया व्यवस्था या:गुलिं ग्वसा

खल:पाखें तेजमान बज्राचार्ययात सुभाय् देछात

किपूया धार्मिक, ऐतिहासिक महत्वं जा:गु भिनिदय् छकः क्यनीगु गथु प्याखं वंगु असार १४ गते
भलभल अस्तमि खुन्हु क्व:चागु दु । व दिनय् किपू पांगा चाहुइके धुंका: नगामय् सी जा नका हसानिसं
थातुंथासय् पालंपा: छ:पिं सिनावनीगु जुयाच्चन । गणेछ: छम्हसं सी जा मनःगुलिं वयकलं छ:पिन्त जल
हा: याना: म्वाका: बी । लाय्कुलीनिसं छ:पिं थ:थ:गु ख्वा:पा ज्वना: ख्वा:पा उइत किपूया सीउइगु थाय्
दिखुइ वनेमा: ।

धात्यें सिथं यंकूथें हे कां पुया: यंकेमा: । न्ह्यावलें सिथं यंकेगु लंपुं सिथं यंके मज्यु । उगु
अवस्थाय् दिखुई मतया छुं हे व्यवस्था मदु । निल: सांस्कृतिक पुचःया म्यानेजिंग डाइरेक्टर नापं
बज्राचार्य साउण्ड एण्ड स्टेजया प्रोप्राइटर किपूया तेजमान बज्राचार्य नं दिखुई भलमल धायेक मतया
व्यवस्था यानादीगु खः । ८००० किलोवाट क्षमताया त:ग्व:गु जेनेटर गाडी तया: हया: जेनेरेटर
चायेका १००० वाटया ६ खुप्वा:मत: थातुंथासय् तयाविल । गुकिं याना: बहनि हे न्हिनय् थें च्वक
यच्चुक सकसियां स्वयेदत । थ्व वयकलं निशुल्क सेवा ब्यूगु खः । ग्वसा खल: व किपूयापिन्सं वयक:यात
सुभाय् नं ब्यूगु दु ।

छिं आ: १२ दँ लिपा जक स्वये खनी ? उकिं प्याखंया बारे सीकेगु खःसा



सफू दइगु थाय् १) ख्वपया च्याम्हसिंहया स्टेशनरी पस: (श्याम सुन्दरया पस:), २) ख्वप कमल विनायकया
स्टेशनरी पस:, ३) किपूया सतःक्वया स्टेशनरी पस:, ४) किपूया देय् पुगूया बाघभैरव स्टेशनरी पस:, ५) किपूया पांगा
दोवाटोया किपू बूक प्वाइट, ६) येंया भोताहिनि नातिबज्रया पस:,
७) येंया कुलाभुलिइ च्वंगु मंका: धुकू पस:,
८) यल, यल ध्वाखा अर्जुन स्टेशनरी पस:,
९) स्वापू नितिं मेमेगु फोन नम्बर: ४३३४०९३, ९८४९७५२५८३, ९८४६०४६९२३९

मू
सच्छि तका जक (१००/-)

किपूया गथु प्याखं (गं मखा:गु प्याखं)

सफू बजारय् पिदने धुकूगु दु
थ:गु प्रति सुरक्षित यानादिसं

सफुतिइ दुने

- १) गथु समुदायया इतिहासनिसें वर्तमान तक
- २) गथु प्याखनय् दुथ्यानाच्चंगु तान्त्रिक व वैदिक दर्शन
- ३) नास: छ:यात किसिलिं छाया तइगु खः ?
- ४) किपूया गथु प्याखनय् दुथ्यानाच्चंगु थीथी पक्ष
- ५) गथु प्याखंया थीथी नां
- ६) किपूया ख्वा:पा: प्याखं मध्ये गथु प्याखं नापं मेमेगु